

A T R O C I S, <sup>2</sup>  
NEC DESCRIPTI PRIUS,  
M O R B I  
HISTORIA.  
SECUNDUM MEDICAE  
ARTIS LEGES CONSCRIPTA  
A B  
HERMANNO BOERHAAVE.



LUGDUNI BATAVORUM,  
EX OFFICINA BOUTESTENIANA.  
M D C C X X I V.

Digitized by the Internet Archive  
in 2019 with funding from  
Wellcome Library

<https://archive.org/details/b30774937>

CELEBRI, NOBILIQUE,

VIRO

D. JACOBO DE BYE,


MEDICO PERITISSIMO,

ET

IN TRIBUNALI HAGANO

SCABINO.

H. BOERHAAVE. S. P.

escripturum me recepi, quae  
in enarrato hic morbo Nos  
una observavimus; pro-  
misi quoque, missurum  
tibi, quidquid foret operis. Af-  
stantem vero vix differenda me-  
gotia impedivere. Serius ideo,  
quam quidem animo destinaveram,  
addit haec historia. Hanc dicare  
tibi volui: quia debui multis sane

\* 2 de

*de causis. Sed gestiebam simul publice testari, laudare me, praeter caeteras Tibi proprias virtutes, eximiam, qua polles in arte medendi, sapientiam. Et candor quoque, morumque amabilis suavitas, efficiunt, ut, cum omnibus Bonis, semper ambiturus sim sinceram Tecum colere amicitiam. Vale ! Lugdun. Batav.*

*I 7  $\frac{12}{12}$ . 23.*





## M O R B I

## N O N D E S C R I P T I

## P R I U S

## H I S T O R I A.

**M**ULTIPLEX sane, atque varium, qui corpora adfligunt humana, morborum ingenium, a pluribus jam seculis observatum, descriptumque habetur. Neque tamen acri profecto, & annosa, hacce diligentia omnis eorum exhauriri usque potuit diversitas. Unde quidem efficitur, tales semper ut accidant novi, quibus tunc cognoscendis nullum satis subtile iudicium Medico sit, ut habeat Ille, & adferat, artis praeceptis recte formatum animum. Imo vero,

A

cau-

causae ambiguus latentis, affectique incertus loci, haerebit jam, qui alias in perspicendis, sanandisque, laudem invenerat. Frustra quoque anceps Ipse saepe quaeras tunc apud Auctores, incertum Te quod firmet; neque datur invenire aliquando, quod similis, jam olim observati, descriptione, absconditam recentis mali indolem manifestare Tibi queat. Quotusquisque enim ille inter Medicos, qui, ignotum sibi morbum dum tractat, requiescere fugiat, donec tecti illius rationem, atque latebras, liquido perspexerit? Enimvero, Medice, qui occurrit novus, atque obscurus, Tibi morbus, post mortem modo serus a Te cognoscetur; neque vel tunc etiam, nisi incisum defuncti cadaver, exacta cum cura perscrutatus fueris. Sed rari occupatissimos inter Clinicos, haec qui velint, aut & recte possint talia agere. Si vero alii dantur inter Medicos, quibus idoneus & promptus ad haec animus, cupidis tamen & peritis vix patet aditus. Necessario igitur fit, ut, qui casus inciderunt olim, parum juvent posteros; sed maneat hos eadem, quae urserat priores, ignorantia. Praecipue quidem, quum praeterea plurimae, atque a peritissimo quoque artis Professore conscriptae rite, tales observationes, inter relictas saepe neglectae chartas, pereant quotidie, atque sepe-



sepeliantur. Ad omnia vero haec artis incommoda haud datur aliud, quod profit, remedium, nisi nova prorsus, atque omnino singularia, quae quis observaverit, ipse evulget. Qua tamen in re ita se gerat requiritur, ut adeo hic plana sit historia, quae perlecta non patiatur dubitare lectorem, quin, quae descriptae eadem jam forte offertur, exemplo cernatur eidem convenire tam evidenter, ut ex praeterito praesentem jam cognoverit. Omnia ergo, quae ad casum utcunque pertinent, recitare oportet; ne minima quidem neglecta re, de qua severus Censor jure adhuc quaereret ad intellectum mali. Simul inprimis sic agendum cauto est ab eo, cui datae partes rem enarrandi, ut incidentium nunquam turbans ordinem, secundum rerum vicissitudinem cuncta ordinet, suisque accidentium singula quaeque locis assignet.

In communia artis bona symbolam me dare exposita coëgit ratio: & quidem describendo morbum atrocissimum, cujus vis major properavit fata Magnanimi HEROIS, ILLUSTRIS, NOBILISSIMI, VIRI, JOANNIS BARONIS DE WASSENAER, DYNASTAE ROSENBURG, ARCHITHALASSI REIPUBLICAE, & aggerum Rhenolandiae Praefecti. Fuit enim singularis adeo tota mali indoles, tam-

que violentus impetus, atque detestata crudelitas: ut forte inter omnes rei Scriptores Medicae alterum parem casum, haud temere reperiās. Utinam optanti daretur hoc praestare, ut rei descriptae memoria liberare deinceps hos posset, quorum fatalis calamitas acerba quoque hac sorte urgebitur! Sed tristis confiteor, nihil tanti, tamque praecleari, eventus, a labore hoc meo sperandum. Id tamen scio, recursurum postea Medicis morbum cognosci inde certo posse. Bonus igitur Medicus immedicabilis mali exitum funestum praevidere certus poterit: unde, juvare licet nequeat, non ignarus utique cavebit laboriosa, sed nocente, opera malum aegro aggravare; neque in re impossibili frustranea se sollicitudine exanimabit ulterius. Serviet exemplo describendae historiae morbi, ut, mea quidem sententia, hanc concinnandam artis regulae dictant. Simul eadem opera constabit saevi casus ratio, quidque hac in re, & per quos, actum sit. In splendida scilicet persona, quae toti reipublicae in oculis geritur & pectore, nemo Medicus suam periclitari famam cupit; sed rei potius gestae rationem palam reddere: quo constet, arte malum majus refutasse invalidae medicinae auxilia. Quidni tollatur denique & eo ipso peccandi ultra occasio malignis



gnis saepe nimium, & acclinibus falso, alienorum casuum commentatoribus. Una his ea placet voluptas, quam ex ambiguis, & suspiciosis, rumoribus, in vulgus sparsis, atque eundo dein crescentibus, ficti pravique tenaces capiunt. Corrupti interim iudices male verum examinant. Omnes hi veriora haec recusare nullo poterunt obtentu. Haec ego si tulerim praemia laborum, contentus mea mercede, recedam.

Pulchrum a natura, atque staturae eximiae, corpus liberalium fere omnium exercitiorum genere, jam a puero, firmaverat: ut hinc sanitate semper illibata frueretur. Neque felicem hanc valetudinem, roburque naturale corporis, unquam labefactaverat luxuria, neque desidia resolverat. Primo natus in sua patria loco, semperque Principes inter Viros versatus, non potuit intra naturae fines vitam exigere, aut frugalitatis leges exactas ubique severus observare. Quis enim ita ageret, qui semper cum Primis esset una, cujusquè talis vita, ut obsequens horum studiis, amicisque deditus, nec illorum cuiquam adversus? Nisi austerae tetricus sectae cultor haberi vellet. Verumtamen, proprio quoties licebat more vivere, sobrius omni carebat excessu, animi semper culturae, atque assiduo exercitio corporis, cum cura se dedens.

dens. Quare & laudabili gaudebat temperatione humorum, neque majori fuerat morbo obnoxius. A multis jam annis, crus perforerat, atque multa inde mala passus infirmiorē hanc partem experiebatur, sanus caetera; nisi quod anginam saepe in juventute expertus fuerat. Una quotannis, longo jam tempore, podagra per stationem hybernā artus occupaverat; violenta equidem illa, & pertinax, neque sueta unquam, absquē insigni ad articulos superstite debilitate, recedere. Eam patientia leviorē facere, neque jactatis exacerbare & noxiis plerunque auxiliis, abstinentia exquisita, blandō tepore, atque quiete, lenire, & pacare, sapienter studebat. Speculabatur interim acerbi mali ortum; utque acri erat, & penetrabili pervidendis rerum causis, multoque usu exercitato, ingenio, collegit, epulis lautioribus, liberaliori usui vini, atque defectui exercitationis, suum hunc deberi morbum: memini audire me saepe sic dicentem. Neque species huic sententiæ veri aberat: semper quippe ex his gravari sibi superius ventriculi os persentiscebatur, & quidem de una tantum hacce re conqueri saepenumero, sed ea modo occasione, solebat. Incidit etiam, ex eadem hac causā, in hanc sententiam, ut putaret, nullo tutiori remedio, cito simul,



& certo, natas hasce cruditates auferri posse, atque inveterascenti jam malo radices praecidi, quam repurgato statim, si quid hanc in partem peccatum fuerat, per leniora vomitoria ventriculo. Placuerat dudum explorata ad haec radices Americanae virtus, quae Ipecacuanha Pisoni, quam copiosa ex Cardui infusu parata aqua juvabat. Identidem vero & solo Cardui Benedicti liquore hunc ad effectum utebatur. Semper tamen difficilius longe tunc vomere assuetus, quoties sic instituisset, omnino facilius, quando radicem quoque assumserat. Ergo, postquam huic jam dudum remedio crebros per usus assueverat, semel iterumque accidit, ut idem intempestive admodum, atque in ipso quidem articularis mali insultu, imprudens repeteret. Summi tunc inde dolores ad viscera, cruciatusque intestinis haud facile placabiles, obvenerant. Monitus inde ab Amicis & Medicis, temperaret sibi a crebriori hac vomendi violentia, ne quid majoris forte exinde eveniret, semper regeffit, a nulla re tam feliciter se levare, nec benigna virtute saluberrimi remedii carere posse: quum semper salutare, & successu pulchrum, id sibi comperisset. Eratque forte hoc unum, in quo necessariis suis dissidens, atque a Medicorum consiliis recedens, suo in his se confi-



lio regebat, in caeteris raro opinionem aliorum sententiae suae postponere solitus.

Atque haec debui praefari ante enarrationem mortiferi mali: ut, quicumque hanc evolvet, sciat omnia, quae industrius Medicus forte discenda putaret ex historiae Medicae lege de causis morbum antegressis, quas latuisse jam pridem in corpore suspicaretur. Ideoque addere malui, quae elegans Censor supervacanea repudiaret, quam omittere quidquam, quod alter scitu ad hoc negotium putaret necessarium.

Accidit itaque vigesimo nono elapsi nuper octobris, ut sesquiprima nocturna ad aedes meas venerit Nobilissimus atque Sapientissimus Dominus, JACOBUS BARO DE WASSENAER, Reipublicae Lugdunensis Consul, moestissimo maximeque perturbato animo rogans, vellem ire una ad GERMANUM Ejus JOANNEM. Percussit illico animum! Quid rei esset, percunctanti profusis cum lachrymis ajebat, hunc suo in praetorio Rosenberg luctari cum morte; aut vel jam obiisse, si qua fides tristi, sed turbato, esset habenda nuncio! Nec mora, pernicibus vecti equis quum eo pervenissemus, in enimus Virum Illustrem suo insidentem lectulo, ut erecti quidem sedentis haberet speciem, flexo tamen antrorsum, & decli-

nante

nante sic corpore, ut deorsum vergeret, itaque abdominis viscera, & diaphragma, pressione hoc ex situ nata intra thoracem apprimeret. Incommodum hunc Aegrotanti situm ut tueretur, a tribus famulis assiduo sustinentibus juvari debebat, & contineri: omnis enim alia corporis positura augebat immantiter dolorem, quo discruciabatur, ut intolerabilis prorsus evaderet; omnium tamen maxime, si conaretur extendere, atque erigere vertebrarum seriem. Quare nec supinus, neque pronus, aut in alterutrum latus poterat decumbere, longè minus sedere erectus. Spectaculo perculsus! memor quippe, quam heröica constantia acutissimos dolorum ferentem saepe fuissim admiratus: quando enectus fere horum violentia, tacitus, seseque cohibens, crudelitatem summam acerbissimae podagrae sedato pectore concoquebat. Spectabatur satis doloris vehementia. Sed magis, quoties ineluctabiles audiebantur gemitus, quos invicto animo vis mali suprema exprimebat, obnitente frustra, & comprimere conante, patientia. Unum erat tristi hacerum facie, quod me recrearet, atque reficeret; praesentem videbam Nobilem Virum, & Medicum Clarum, JACOBUM DE BYE, cujus eruditionem, summamque in arte prudentiam tota laudat patria, a

quo optima quoque hoc in casu sperare praesidia licebat. Ingresso igitur mihi, atque salutanti, dum erigere se paululum, dexteram offerre, blandasque resalutantis voces reddere, conatur quam humanissime, ad minimos motus, & ad singula verba, deficere videbatur prae exacerbatione aucti ad haec doloris. Tentabat dein exponere Ipse, sub quo gemebat, morbum, nec potuit: intendens se ad conamina quaeque cruciatuum immanitas intercipiebat spiritum. Ut aliquoties in haec erumperet; cogita Boerhaavi, quae meam expugnent patientiam tormenta, gnarus es, quo animo dolores olim tulerim! Cogita, quae sit vis, cujus magnitudo lamenta vocalia mihi, nec suppressenda, extorqueat! Equidem impossibile videtur, tali hominem cruciatu affici posse! D durum videre, & audire, haec coram! crudele, si ultra sciscitando causam dedissemus malorum exacerbationi. Requirere visum potius ex Eruditissimo Domino FRANKEN omnem rei historiam. Ille enim, dum unici, quem habebat Illustrissimus Archithalassus, Filii generoso pectori summa cum felicitate eruditionem, sapientiam, & virtutem, infundit, domesticus Illi vivebat; Praesens ille toto mali tempore, intentissimo in omnia animo, atque ad omne auxilii genus prae-



praesto, fuerat. Rogatus ideo, audiente omnia, & singula quaeque confirmante, Nobilissimo Aegro, historiam Nobis integram enarravit.

Triduo ante morbum epulatus paulo lautius cum amicis, abstinencia deinde severiore excessum qualemcunque correxerat. In ultimo prandio, ipso invadentis morbi die, de jure carnum, in quo oleraceae incoxerant herbae, aliquid sumsit; attigit & parum de brassica alba cum ovilla inibi elixa; gustavit modo & de spinachia & glandula Thymovituli leniter frixato; de anate plusculum comedit, coxam inde & carnem de pectore capiens, tum alaudas binas, parvamque intritae ex pomis copiam; frustulum pyri, uvarum tantillum, & panis, ex bellariis assumens clausit prandium, in quo parum cerevisiae, vini mosellani modicum, biberat. Toto dein pomeridiano tempore ab omni merenda, potuque, penitus abstinuit. Equitavit cum Nobilissimo Barone, filio suo, hilaris, recte valens, sentiens nihil, nihil suspicans, mali.

Ubi ab hoc exercitio, quod optime cesserat, reversus, more suo perstitit incoenatus. Dimidiata vero decima vesperi exhausit de aqua tepida, in qua Carduus Benedictus intabuerat prius, quantum tria capiunt potoria

ria porcellana, quae *Spoelkommen* Belgis solent dici. Causam rogatus regeffit, onerosi quid molestare os ventriculi superius, quod eluere vellet: quum consuetum jam pridem ibi malum referret, semperque peracto illud vomitu ablatum fuerit. Vomuit haud diu postea, neque tamen facile satis, nec satis multa. Sumsit ideo mox post haec, quantum quatuor talia continere queunt vasa, de eodem liquore amaro Cardui. Tanta interim jam copia plenus haud evomuit tamen; novum protinus parandum jubet, miratus moram, putansque largius infundendo expeditius se haustos redditurum potus. Verum in sella dum sedet interim, atque provocare tentat vomitum, nihil usque percipiens aliud mali, clamorem subito horrendum tollit, ad quem exhorrescentes advolant domestici, querentemque audiunt, circa ventriculi superiora ruptum sibi quid, dilaceratum, aut luxatum, esse. Addebat, acrem exin adeo dolorem insurgere, ut praesentem, & inevitabilem omnino, mortem jamjam instare, quam certissimè, quam vividissime, sentiret. Meliora omnia sperare monent praesentes. At ille respondit, in pauca modo vitam temporis momenta duraturam, quae in imis suis penetralibus usque adeo validis tormentis urgeretur, ut praesidii nihil

ab

ab arte haberi possit, neque aliquid a natura solatii; nullis vero, vel quaesitissimis verbis, dici posse, quae mutatio, quis cruciatus, petus exagitarent intus. Suadebant ideo, accersendos extemplo Medicos, atque obnixe efflagitabant omnes, faceret ipsis hos convocandi facultatem. Supervacaneum id fore dixit: neque enim posse eo tenus vitam trahi, ut spirantem invenirent vel festinantes; sed & adversus hoc malum, quod corrigere omnino nefas, nulla opitulatura esse blandimenta Artis vel praestantissimae. Unum superesse, ad quod fides ipsorum profutura foret, & auxilium, unum id serio se petere, ut in duplicatos componerent poplites affictum corpus quam ocyssime: ut supplex, & humilis DEUM venerari, Ei obnoxium se dedere, Ejus salutarem implorare opem, posset. Maturare enim suos impetus usque adeo festini morbi pernicitatem, ut & sola haec jam necessaria brevissime impeditura foret. Obsequiosi parvum ocyus, fufisque Ille ad NUMEN SUPREMUM precibus, jactato interea per cruciatus corpore, positus statim in lectulum fuit. Manare jam frigidus gelidos per artus sudor, tristisque occupare ora, manusque, pallor, deficere subinde arteriarum micantium pulsus. Ad haec Ipse petebat, frigentis ut corpus perfricarent undique calefactis



factis ad focum linteis, caputque perfunderent & pectus liquidis herbarum traumaticarum odoribus, simul fragrantia praecordiis fomenta largius ilico apponerent. Quibus assiduo, seduloque ex voto Aegrotantis peractis cedere nescius restitit morbus. Imo vero multo saevius omnia insurgere, atque festinare in exitium. Quo quum res Ejus loco esset; interimque nox intempesta, ipsaque locorum, unde evocandi erant Medici, distantia, auxilii inopes & consilii redderet praesentes, post semihorii elapsi spatium bibit de oleo ex olivis presso uncias quatuor, irritataque per intrusum digitum gula, aliquid ejus evomuit aquae Cardui permistum; poposcit denuo binas ejusdem olei uncias, hausitque ilico, sed de eo haud modo reddidit nihil, ut ne quidem ullam inde nauseam persentisceret, incrementum interea semper dolore. Dilapsa erat ab hoc negotio peracto hora dimidiata, quum de generosa, & medicata, Gedanensium cerevisia (quam *Joopenbier* vulgo appellant) calefacta prius uncias epotavit quemadmodum sex. Hanc tamen ipsam, nulla commotus nausea, retinuit, ut & cuncta, quae deinde accepit. Talis rerum facies erat. haecque gestorum usque ratio, quando Celebris Medicus DE BYE, Haga vocatus, primo accessit; qui  
omnia

omnia recta secum via reputans, prudens censuit, sola per levissima agendum remedia; mollia ergo avenae ptisanaria obtulit sorbenda, a mollibus scilicet hisce malo lenimen sperans, quod exasperatis partium nimio vomendi impetu offensarum nervis, plausibili sane argumento, colligebat. Sed & fomenta simul ex lacte & farinaceis parata quam blandissima, tepefacta praecordiis obduxit; quae omnia certam promittere spem salutis videbantur: atque ipsa haec agenda dum curantur, jamque aliquo essent, sed frustra, applicata tempore, ingressus ipse, ut exposui prius, omnia ita reperi.

Audita ergo casus tristissimi, atque eventus rerum gestarum, historia; quae ex omni adferebantur parte, recte perpensis; acerrimam adhibuimus mentis intentissimae aciem, ut perspiceremus atrocis adeo, & subitanei, doloris rationem prius, quam agitare audeamus de offerendis remediis: quum nisi huic potissimum operi institerimus, tutus ad haec ipsa, nisi a cognitione causae, aditus ne dari quidem possit. Singula excutientes haec in ipso Aegro deprehendimus. Interiora oris, qua in fauces usque patet, naturali humore rite colluta, optima hic sanitatis absolutae signa dabant; neque in colore, aut habitu, partium inibi conspicuarum, nisi bonae salutis notae; nausae nihil penitus; vix ullus ructus;



ruetus; & non erat, si quid flatuum forte eructaret sursum, alienus, aut ingratus, sapor; qui linguae sensum offenderet; quin & ventriculus, haudquaquam repugnans, cuicunque potui ingerendo paratus, facilis ad oblata quæque; nec reluctabantur fauces deglutitioni, neque ullum inde patiebantur incommodum; sitis non urgebat; nec audire erat vel levem de anxietate ex aegrotante ventriculo querimoniam; singultus aberant & in toto sane mali decursu; pertractata jam hypochondria, & praecordiorum loca, tumidi nihil, aut dolentis, nihil ad tactum renitentis, durive exhibebant; erat & naturalis, & dimissa commodè, urina; spectata vero, quam per vomitum rejecerat, materies nullum prae se ferebat indicium maligni, insuetive, referebat quippe perfecte eorum, quae ingesta fuerant, indolem.

Toto calorem temperatum corpore, aequaliter diffusum, hoc tempore deprehendimus, absque aestu, aut excessu frigoris: nisi quod vehementia exacerbati identidem cruciatus syncopen minaretur, atque adeo frigus eo temporis articulo efficeret majus, quam pro ratione tantæ agitationis, dolorisque, expectandum videretur; erant etiam aliquanto imbecilliores quidem arteriarum ictus, constantes tamen, satisque unius modi, utique  
osten-



ostendebant nec febris, neque inflammationis vel levissima signa; spectabatur & respiratio facilis, lenta satis, aequabilis, vox simul naturalis, placida, constans, expedita, si caveret modo inter loquendum flexus corporis, & septi agiliores motus, ipsa suspiria rogatus duxit profunda, lente reddidit, repetivit, absque doloris exacerbatione, nec recordor vel semel toto in morbo audire tussim; & suus adhuc constabat micantibus oculis nitor, atque naturalis etiam in vultu color; actiones mentis deficientes nunquam, neque aberrantes; arbitrarii partium motus prompti, nisi quatenus dolorum aucta ex illis vehementia hosce prohibebat.

Unus igitur occurrebat explorantibus, de quo omnis lamentatio, dolor; atque inexplicabilis prorsus mutationis cujusdam in situ partium, intra pectus, sensus. Quem quidem, utcunque nos omni modo investigaremus quaerendo, aliter describere non potuit, nisi dicendo, manifestissime persentiscere se naturali sua sede motas esse in thorace suo partes quasdam. Dolorem vero, quem ferebat, definivit quam appositissimis sane verbis; quod esset nempe acutissimus; veramque dilacerationem membranarum, quibus sensus inest exquisitissimus, quam saevissime exprimens; summus; perpetuus; ne mini-

mi quidem articulo temporis quiescens, vix unquam de summa acerbitate tantillum remittens. Sedem huic fixam in mali principio unam semper assignabat quam distinctissime, eum assiduo locum indicans intra pectus, ubi fere committitur stomachi per thoracem delati finis principio ventriculi supremo, altius tamen paulo ostendebat accurate, quam ut possemus credere, diaphragma ipsum dolere. Verum, progressu postea magis morbo, clamabat, sentire se vividissime, quod a prima designata pectoris interna plaga, dolor aequae violentus retrorsum se extenderet, jamque dorsi etiam regionem occuparet, haud minus ibidem, quam antea in origine sua, desaeviens. Denique, ante fata tandem querentem summa cum commiseratione audivimus, diffundi acerrimos dolores a loco ad dorsum discruciato utrimque per latera thoracis, imo & ultimo per omnem hujus internum ambitum: ita tamen, ut priori loco levaretur ne hilum, dum diffusior per latiora se & nova spatia prorogaret. Neque affirmare neglexit toties rogatus a nobis, latitudinem dolentis mali de exquisita acerbitate in qualibet parte nihil demere. Integro quin etiam decursu mali constanter commemorabat, non alia re acrius incendi cruciatuum ignem, quam flatuum nisu; prorsus, ut ventus

tus inde erumpens ex ventriculo haud tenderet sursum, sed suffocatus quasi vivas paulo post partes quam crudelissime dilaniaret; neque minus inflammabatur idem, quotiescunque retro flectere, vel & erigere vertebrae dorsi conaretur.

Haec ea sunt omnia, quae anxia cum diligentia reperimus, quaeque forte nimia cum cura enarrata quis repudiet. De industria sic institui agere: ut recitatio haec ita referret omnia, quemadmodum contingere, Lectori meo, quare omissum nihil, nihil, praeterquam quod ipsa res habuit, superadditum, aut exaggerando amplificatum.

Vos ego jam, salutaris Professores disciplinae, si forsitan perlegere haec non dedignamini, rogatos serio, & quam officiosissime, velim, paululum hic ut subsistatis! Velitis, oro vos, circumspectè ad omnia perpendere fidelem hanc historiam! Omnia, quae speculantibus offeruntur, signa prudenter consideretis! Hoc mihi dare si placet, utar permissio, atque petam ultra, statuatis jam ex his de natura hujus mali, cujus modo intellexistis originem, progressum, apparitiones. Ubi & illud impetravero, dicite, quaeso, mihi, quidnam demum sit illud, quod latens hic intra thoracis adyta abnormia haec effecta producit? Pronunciate



secundum leges excultae artis severissimas, quaenam definita pars sit ibidem, quae tam horridica mala patitur? exercete ingenii aciem, ut, sed priusquam sequentia evolve-ritis, sponte vestrae perspicientiae vera super his, & certa, invenire possitis!

Nos utique ambo contemplantur undique tabulam, quae omnes hujus tragoediae partes nimis vivide exhibebat; sollicitissima simul & intentissima mentis curaolvebamus cuncta, quae attentae se cogitationi ingerebant. Fundamentum quaerebamus inconcussum, tutumque, quo subnixa intelligentia incogitare posset finem invalescenti malo, extricata scilicet prius involutissima tantae calamitatis causa. Sed, proh dolor, quam nos incassum versabamur omnia! neque enim circumspicienti in densis tenebris animo apparebat ulla morbi species, ad quam referendum hunc perspicere possemus. Inflammatio sane, saeva alias tormentorum genitrix, incusari hic non poterat: nulla ejus se manifestabat nota. Quis ausit suspicari, diaphragma, pleuram, mediastinum, pericardium, cor, pulmones, oesophagum, intercostales musculos, vel adnatos externe costis, phlegmone affici? Qui sedulo mali historiam descriptam prae oculis habet, cautusque est signorum observator? Nemo, si quid in his

veri

veri cerno. Transvectis ergo hanc plausibilem ignaris apparentem, sed refutatam penitus causam cruciatuum, eo flectere incipiebat animus, num forsitan tumoris alicujus assurgentis mole distenta nervosa quaedam in pectore membrana dilacerationis excruciante sensu crudelia haec symptomata generaret. Sed nullum genus tumoris occurrebat, aptum natum quod esset effecta edere omnia, tamque celeriter, quae observabantur; neque vero ex praegressis ante morbum quidquam notabatur, quod vel suspicionem talis rei posset movere; nisi acuta saeviret phlegmone, quae jam remota prius fuerat ex ipsa sedula mali observatione; luxatio autem admitti non poterat: quum firmae vertebrae suo quaeque spectarentur loco; molliorum autem in pectore partium propria ex sede secessio distorsionis sensum, neutiquam vero mortifera illa tormenta, valebat procreare. Ergo supererat unum tandem illud, quod toties olim dolorum atrocitas citissime humanam destruxit vitam, truculenti scilicet veneni lethale virus, & visignea. Solum illud videbatur intelligi posse immanium adeo phaenomenon causa sufficiens. Verum enimvero dum sedulus curae omnia Scriptoribus commemorata Toxicorum genera percurro, reperi ne unum, quod foret ef-

ficax descripta prius efficere. Quum enim muneris, publica mihi auctoritate impositi, ratio exigat a me, haec ut paulo accuratius cognoscam, historiam adeo virulentorum intuitus ut excutiam, haec ego prosequi annis dudum fui opera non perfunctoria. Ut vero animum verterem per omnia, non mihi fidelis suggessit memoria ullum ex his, cuius lethifera ita invaderet, ita procederet, actio, aut vel levi assimilatione hujus referret morbi symptomata. Ita, dum lustramus notas dolorum causas, occurrit ne una, cui tribuere fas sit praesentis originem. Incertus ergo nobis, vagusque, per varias rerum species diducebatur animus, circumspiciens sollicitè ad omnia, inveniens nusquam, quod tuto arriperet pro vera mali causa. Tandem credebatur quam maxime hanc ad rem pertinere contemplatio familiaris dudum podagrae. Hujus quippe immanis toties, quoties introverta desaevit rabie, detonat in interiora crudelitas. Nimis vero erat utrique nostrum perspecta anomali hujus morbi indoles, quam ut eam quoque pro origine aegritudinis auderemus fidenter arripere. Etenim parit huc delata ineluctabiles quidem anxietates, atque toediosissima aegrimoniae fastidia animo aegro imprimit, dolores vero subito enormes adeo nunquam sa-



no excitat; sed lento gradu incedens languore tardo debilitat prius, in dolores deinde infestos insurgens, tum quoque partium actiones vicinarum impedit. Eorum vero omnium nihil quidquam videre erat hoc in casu: unde & , hac re recte explorata, & spectata undique, anceps primo, imo & inflexus haud parum in hanc partem, animus induci nequaquam potuit, ut & hinc derivaremus hanc calamitatis originem.

Ambiguus ita nihil illuxit! occurrebat ne unus, internotos, morbus, ad quem assimilatio ex imaginis convenientia hunc referre poterat in dignoscenda specie. Unum hoc certum, esse dolorem, subito ortum, summum. Illum ferri posse diu, absque tamen vitae discrimine, solus si est, & inflammatione liber, tota clamante medica historia, ne quidem in principio statim summa metuebamus; de me, ita ut confitear, candor exigit: Neque enim, librans cuncta, prudenti cum ratione videbam aliquid, unde futuram subito mortem timendum apparebat. Neque erubui sane vel ita praedicere, postquam primo cuncta examinaveram: atque eventus postea docuit, dolorem haud fuisse subitae mortis, sed aliam longe, causam.

Quamvis vero ancipites omnino in dignoscendo haerebamus malo, coacti tamen fuimus,

mus, prompta tentare in auxilium dolorum remedia: virulenti enim tormenti immanitas, & metuenda partis laborantis ex tanto malo pernicies, haud patiebantur moram. Collatis ergo inter se, & petitis undique, consiliis, deliberatum stetit, ea maturius exhibere, quae impetum vitae in obsessas partes compescunt, solvunt pressa, distenta laxant, mitificant acria, & irriguum totum reddunt humoribus corpus. Quid enim magis conveniens sedando, quacunque demum sit natus causa, dolori? Salubrius quid habetur, quid tutius, in robusto, atque sano caeterum corpore? Quum grata igitur nobis, sed fallax, spes blandiebatur, dictum factum, missus de mediana dextra sanguis ad uncias quatuordecim, ita quidem languescere ut inciperent pulsus arteriarum. Sed ne sic tamen vel levissime de rigore crudelitatis remittebat dolor, licet minarentur syncopen arteriae. Adhibitus statim largior juris vitulini insulsi, ut nervis laesis amicissimi usus, & sic tamen exacerbescabant dolores acrius. Tepida applicabantur cruciatibus fomenta, quae ex mollissimis farinaceis & lacte blando constabant, atque leni tenebantur actiuosa tempore, nihil proderant. Sed neque laudata toties blandimenta dolorum, quae ex lento avenae, scorzonerae, & Sisari, lacte eliciuntur,

tur, epota juverunt; contra vero & suavissima haec, quoties ventriculum versus deferbantur incitabant abominandi tormenti saevitiem. Haec acta, his frustra pugnatum; nec enim profecimus, pertinax constitit, nunquam cedens, dolor, usque in matutinam quintam; quando urgens negotiorum multitudo me discedere coëgit ad aliquot horas; postquam prius steterat nobis, sibimet parumper naturam committere, neque urgere nimis haud modo frustraneis, sed & ut videbatur, nocentibus medicamentis, licet lectissima, credo, & Tibi, mi Lector, laudentur. Speratus aberat conatibus eventus, contra vero fluere tota & retro sublapsa ferebatur spes. Interea multo magis jam, quam modo prius, horrescebamur obtupestacti absconditam insueti morbi indolem; ut, ante discessum uterque utrumque interrogantes neutri potuerimus respondere aliquid, quod manifestaret latens malum. Luctatus ita deinde Nobilissimus HEROS in matutinam octavam, usus subinde haustu ex decocto parato de floribus papaveris erratici, atque verbasci; radicibus scorzonerae, sisarique, seminibus avenae & papaveris albi, cum aqua, in quo dein Fernelii syrupus de althea largius quoque erat dilutus. Unde nihil accepit solatii. Attamen anodynum mitius occurrebat nullum. Fi-



delissima interim, & sapientissima, aderat cura peritissimi Medici DE BYE, qui in finem vitae praesens semper adstitit. Ille autem hoc tempore observabat, ex pertinaci incrementis tormenti violentia sola, deficere, & labi, actiones vitales, caeterum nullius novi accessione symptomatis dilucidius apparere morbum. Quare scripta tunc ad me de praesenti negotio epistola monuit Vir optimus, proposuitque, in re adeo ancipiti, summo-pere simul urgente magis magisque, nunquid periclitandum esset, quidnam forte boni altera efficeret venaesectio, potissimum quidem, dum arteriarum ictus crebriores jam, & paulum fortiores, insurgerent, atque inspectus etiam, qui prima vice fuerat eductus, cruor, tenaciori, atque subviridescente crusta tegeretur. Movebat igitur sperata doloris remissio, ex debilitata ulterius vitae actione. Neque a parte Aegri obstare quid credebatur: dum paucas modo ante horas valido corpori illibata constitisset sanitas, neque evacuatio ulla, una excepta prima missione sanguinis, vel minimum vires labefactaverat, interimque assumpta, nec reddita, auxissent bonos, haud diminuissent, humores. Deliberavimus ergo, ut solveretur denuo, & statim quidem, vena; ita tamen, ut prius injiceretur clyster paratus ex unciis

ix. emollientis ad clysmata decocti, quod pharmacia habet recentior. Leydenſis, ſalis gemmae drachma una, ſyrupi Altheae Fernelii unciis duabus; quo tentaretur pariter, an hac forte via toties affectatum fruſtra levamen pertinaciſſimo poſſet adferri malo. Conſultum etiam habitum fuit, ut pergeret porro anodynis uti atque emollientibus internis, qualia uſque ſuſſerant. Ne vero credat quis, neglexiſſe nos incuria, aut ex oblivione omiſſiſſe, narcotica! imo vero haec recte conſideravimus, num utilia forent ad hocce mali genus. Sed graves movebant nos rationes, ea ut hic repudiaremus. Quarum ſane potiſſima nobis ea videbatur, quod opii nota virtus omnes inhibere ſoleat evacuationes, una quidem inſenſibilium perſpiratione exempta, vomitum utique, alvi fluxum, urinae evacuationem quam maxime, impedire. Nobis vero hic erat tractandum plenum corpus, differtum penitus humoribus aſſiduo, nec parva certe copia, per tot horas jam ingeſtis; quorum interea nihil fere redditum fuerat haecenus. Hos igitur omnes retineri expanſo quidem, ſed conſtricto per convulſionem utroque in ventriculi orificio, ſtomacho, cogitabamus, ut qui huius eſſemus rei quam certiſſimi. Sed quam falſo! protinus omnia ita peracta ſunt. & clyſma tunc injectum

ctum ocyus solvit, & commode, alvum, subduxitque satis, qualia decedere solent recte valentibus, excrementa corpori; sed nihil inde compertum est auxilii. Hora dein nona ante meridiem, haud ita diu ab effectu Clysteris, pertusa iterum vena dimisit sanguinis decem uncias. Sed neque & hinc vel fuit mutatus dolor. Contra diri magis dolores discruciabant, nec pacare erat horum saevitiem per placidissima quaeque remediorum. Haec Ille considerans, inter atrocia dilanationis tormenta, composito profecto, & sedato, pectore, nec ignarus, neque venturi incautus, domestica ordinare, amicis suis atque necessariis extremum vale dicere, DEO resignare data, constantique asseveratione praedicere, ope humana nihil ad hoc malum solatii afferri posse, caeterum velle se agere, patique, quaecunque vel fortuita Medici suaderent.

Accedentem rursus me pomeridiana tertia amicissimè excepit, atque salutavit, ut semper, quam blandissime, statimque certum fecit simul, quam omnia expertus esset irrita, quamque certa brevi instaret jam, & quidem unice optanda, mors; si vero superesset quid in arte necdum tentatum, quod crederetur profore, paratum se, qui spe finis vel durissima quaeque ferret, atque incertum



certum quoque vel anceps experiretur, Carissimum se id debere pignori, caeterisque consanguineis, ut intelligerent, fieri quae poterant, fuisse facta. Vidi tunc, quum omnia haec proferret quam mitissime, praesentem jam instare mortem! Ast aequae interim & jam obscuram acerrime dolui diagnosin! urinae ab aliquot horis nihil demittebatur amplius, nisi quod pauculae conatu magno, neque sine urentis ardoris sensu, guttulae exprimerentur. Deficiebat plurimum debilitata jam, & oppressa, cordis, arteriarumque, actio. Citatus quoque anhelitus, atque interdum fractus, suffocantis quid & intercipientis spiritum, ostendebat. Frigebant extrema cum pallida mortis imagine. Mens bona. Et tum quoque priori idem datus clyster extemplo alvum solvit; cedere nescius stetit dolor. Questus de conatu egerendae urinae vi magna paucissimas tantum expressit guttulas, acris odoris, crassas, rubras: ut constaret liquido, de tanta potuum ingestorum copia nihil ad lotii officinas pertingere. Fortiter jam urgebat spirandi difficultas. Rursus in deliberationem itum fuit, atque per consultationem tota denuo res ventilata; iterum specie veri decepti collegimus, haerere omnia in constrieto, nihilque demittente ventriculo. Summa

ma ideo ope nitendum, & supremo tentandum conamine, ille inaniri ut posset, fatalique suo levare onere, solutis, quae impedirent exitum, repagulis. Simul putabatur efficacius id, tutiusque haud posse perfici, quam si, hausto prius ad binas uncias presso de amygdalis dulcibus oleo, epotisque desuper septem tepidae unciis, fauces humecta oleo penna irritaret, sicque postrema tandem vice periclitaretur levare ventriculum. Ita inani nos consilio disputabamus! Ignaris etenim latentis causae nihil affulgebat spei, nisi ab unica, & promptissima quidem ventriculi evacuatione. Supputabamus nempe liquorum assumptorum copiam; comparantes dein, quam parum per vomitum, ut nihil fere per lotii vias, exinde redditum fuisset, imo ne quidem pervenisset eo, haud potuimus non colligere, quin tota illa ingestorum copia uno haereret in ventriculo. Illum ergo omnem mali sedem, illum immaniter distentum, illum spasmio pylori contumaci, & oris superioris violenta convulsione, contractum esse. Quomodocunque negotium versaremur, a quacunque contempleremur parte, semper eadem redibat idea. Sed errantes nos in causa hac, & sede, assignanda morbi, in falsa magis duxit deprehensus jam, atque assurgens perpetuo accrescendo

do in epigastricis manifestus tumor. Interim, dum ipse Nobilissimus Aeger nostra super his omnibus colloquia audivit, & consilia intellexit, ita arrisit propositum hoc de tentando adhuc per lenia remedia vomitu, ut non modo illud comprobaret tanquam unicum, quod suo posset subvenire malo, sed & confestim occeperit negotium. Ingenti igitur animo hausit oleum, & tepidam, magno dein conamine irritavit fauces, reddiditque parum liquoris fusci, absque oleo, & absque ullo levamine. Ultra cupidum agere vires defecerunt: Defatigatus itaque abstinit, tumque prima quidem vice in dextrum latus decubuit, alsit mox, totusque expalluit, profuso universum per corpus sudore gelido; neque diu post haec, resolutis subito viribus, quinta vespertina, quam placidissime exspiravit, cunctisque flebilis bonis Vir inclytus occidit.

Clarus Dominus *de Bye* mecum secessit, atque, habito super hoc casu sermone, fassus sumus, haudquaquam exputare nos posse causam morbi, multo tamen minus mortis tam subitaneae: igitur neutri nostrum ita quiescendum esse, priusquam, inspecto cadavere, evidenter sciremus, an ignorantiae, neglectui, vel alii cuidam commisso nobis vitio, imputanda foret jactura crediti nobis

Vi-



Viri Nobilissimi? an vero major latuisset in corpore causa, quae nulla fuerat arte humana medicabilis? Petivi itaque exquisitissimis precibus ab Illustrissimae Familiae Capite, liceret nobis in cadaver ipsum introspicere. Assensit benigne voto flagitantis Vir Nobilissimus. Viginti & quatuor horis a morte Defuncti corpus aperui, praesentibus, Nobili D. *de Bye*, Reverendo D. *Saurin*, Eruditissimo D. *Francken*, Viro Honesto *Nicolao Stam*, atque chirurgo famulo. Observatorum seriem ita delineare jam annitar, ut praesens ipse si fuisses, potuisses contemplari.

1. Nudatum cadaver undiquaque, intentis per omnia oculis pererrantes, accurate perlustravimus, erat integerrimum illud, hominisque vegeti, in nulla parte externa laesi quid spectabatur, praeter paucula jam commemoranda.

2. Ab utroque scilicet latere, cutis obscurius rubro colore, eoque subpurpurascente, foedata deprehendebatur, cum intersparsis hinc inde atris fere maculis per illa loca; singulari quidem, & sane terribili, spectaculo: prorsus ut cerni solet in his, quibus acutissimam per inflammationem siderantur intercostalia, atque inde exteriora turpiter livescunt. Funestus ille color occupabat omnem

utrim,

utrimque plagam corporis, quae circum-  
scribitur recta ducta in utroque latere pecto-  
ris a media clavicula deorsum, donec attin-  
geret per viam sterno parallelam hypochon-  
dria, inde vero ambitu ipsius diaphragmatis  
ad lumborum usque vertebrae retrorsum, su-  
pra vero usque in altitudinem axillarum se di-  
stendebat.

3. In toto autem descripto jam spatio, ubi  
luridus hicce color deturpabat adspectum,  
frequentes apparuere, albae, exiguae, di-  
stinctae, bullulae in epidermide, quales ad-  
esse solent in cuticula, ubi haec locis incum-  
bit sideratis.

4. Quum porro sollicite attingerem, at-  
que digitis leniter valde attrectarem haecce  
loca, miram sensi in illis mollitiem, adeo-  
que singularem certe, ut similem alias inve-  
nire non meminerim. Erat nimirum flatu-  
lentus tumor, qui non altus, sed latus val-  
de, se diffundebat. Cedebat pressus, atque  
laxatus in priorem altitudinem sponte resur-  
gebat. Examinanti vero attenta pertracta-  
tione exhibebat levissime crepitantium vesi-  
cularum sonitum quasi, & sensum. Ut equi-  
dem speciem referret perfectissime, quae ob-  
servari consuevit in illa humani corporis  
membrana, quam Vir in Anatomicis primus  
*Ruyschius* tunicam appellavit cellulosa; quo-

ties scilicet illa, inflatu distenta aëris, turgēt, atque molliter tum palpata digitis videtur crepitare leniter. Haec vero genuina emphysematis species late se extendebat per omnes partes illas, quae colore lurido infectae spectabantur, quin & amplius extra easdem quoque hinc inde se ostentabat.

5. Abdomen elatum, assurgens, tensum, praecipue tamen ad hypochondria, & epigastrium, ita sane, ut alieno valde, eoque insigni, tumore assurgens ibi emeretur.

6. In caeteris pulchre nitens, candidusque, spargebatur color, optimusque laudabatur habitus, qualis ea ornat, quae secunda fruuntur valetudine, corpora.

Singula haec enarrata, ut notarent accurate, atque firma quoque habere vellent in memoria, perpetuo monui praesentes: quum mira haec & singularia penitus spectacula rerum adspicientem me percellerent, atque in millenas, omnes tamen falsas, suspiciones abriperent assiduo. Ubi denique nihil in facie corporis exteriori circa abdomen, & pectus, non exploratum oculis, manibusque, relictum, ad perspiciendam corporis conditionem internam animum advertimus, oculosque, caventes potissimum ne quid nostra hic opera ita turbaretur, ut incertos faceret indigoscenda ipsius mali natura.



1. Itaque dein epidermide, & cute, incisus levi inflictâ plaga, quam ab extrema xiphoïde cartilagine rectam in umbilicum moliebar, demiratus fui, quod vulnus statim in amplum valde hiatus pateſcebat ſponte ſua, depulſis veluti, & diſtractis vi in latera ejus labiis, atque aſſurgente ſimul per hoc ſpatium adipe præter naturam inflato, & elatiſco; muſculi autem, & cætera circa abdomen, quam ſaniſſima cernebantur, niſi quod circumfuſa pinguedine tam mire inflata per omnia hæc loca involverentur, quæ renitens tactui, duraque præter naturam, ubique erat.

2. Peritonæum poſtea, qua parte integumentis his jam liberum erat, in regione epigaſtrica in altum exſurgebat, ut conſpicuus, valideque diſtensus, ejus tumor, veſicæ inſtar adacto per flatum aëre turgidæ, poneretur ob oculos, atque per patulum vulnus emineret, in reliquis etiam partibus peritonæum tenſum quam maxime, & extrorſum turgens, ſentiebatur.

3. Simulac vero, apice cultelli in elatam peritonæi membranam adacto, cuſpidem leviter per illud tranſegi, nulla certe ſubjacentium partium vel leviffime læſa, e veſtigio aër exſiliit notabili cum impetu, magno cum ſibilo, ingentique copia. Id iterum ſingulare

lare prorsus effecit, ut & hic subsistens varia volverem mecum, atque ruptum quid falso suspicarer in cavo abdominis, per quod deglutitus exivisset aër. Utcumque erat, admonui omnes rarius contingentem observare rem ut dignarentur.

4. Discisso hinc versus epigastrium peritonaeo, quamvis parum, ilico fortissime appressus huic, & ad rupturae minas inflatus, ventriculus se obtulit, exsiliitque celeriter per vulnus, quousque per hoc partem suae molis potuit adigere.

5. Tumque percisso ad decussim circa umbilicum à fine ossis pectoris in pubem usque, rursusque utrimque ad vacua lumborum dicta spatia, eodem peritonaeo; reductisque quam prudentissime quatuor segmentis ita, ut laederetur nihil, nihil sua ex sede turbaretur: peritomaei facies interior spectata est pulcherrima non modo, sed & omnia abdominis viscera, sponte sic oblata oculis, sanissima reperiabantur, absque omni nota inflammationis, sine ullo alterius mali indicio. Unum exceperis, quod a sanitatis divergebat signis, quod scilicet intestina, & ventriculus, flatibus extensa, magna inde, & turgidissima spectarentur.

6. Scrutatus ordine ventriculum, omentum, hepar, intestina, lienem, nihil quidquam rep-

repperi praeternaturale in his, praeter modo dicta. In una tamen Ilei parte, haud ita procul a caeco cernebatur locus, in quo intestinum hoc constrictissimum erat, dum supra eundem, atque infra, statim valde dilatatum se extenderet, ut speciem daret fistulae intestinalis fortiter inflatae, atque interim vinculo parum lato constrictae. Nulla tamen aderant volvuli signa. Coecum valde fuit inflatum. Colon nihil praeternaturalis habuit. Urinaria vesica vacua penitus, inque minimam contracta molem, & sicca fere apparebat; qua quidem re vix alia mihi tum est mirabilior visa: quum nihil lotii per tot horas a tam largo potu egresserat vesica, haecque ideo urinae quam plenissima expectaretur. Diaphragma quoque sollicite exploratum, totum quantum bonum repertum fuit, inculpatumque. Nec ulla in mesenterio morbi cujuscunque nota. Perspeximus & modo integrum cavi abdominis spatium; ut certi redderemur, an in eo forte effusus haereret quacunque demum, coeca licet, via humor ille, qui tam profusus epotus, neque tamen redditus erat. Sed neque hic vel vestigium suspecti mali haesit: quum nihil equidem humoris extra vasa sua fusi deprehenderetur. Nullum itaque mali indicium omni hac perscrutatione deteximus, praeter solos

C 3      flatus,



flatus, qui ventriculum inflabant & intestina. Haesimus multo jam, postquam sedulo vel minima quaeque excusseramus, quam dudum incertiores. Nihil cernebatur, cui mors, aut vel morbus, posset jure imputari. Ventriculus tandem distentissimus, ingens, caeterum nullomodo culpandus, oculos in se trahebat spectantiumque animos. Hunc ubi intra appositas comprimebam manus, renitentem quidem, neque tamen durum, inveni. Utcunque vero conarer flatus exprimere distendentes, inanem adhibui operam, patiebatur densari in angustius spatium, nequaquam vero evacuari ex ventriculo materiem distendentem, quae simul definebat compressio, resiliens in pristinam se figuram, atque magnitudinem, restituit. Elevanti autem levis admodum sentiebatur; ut vel ita constaret flatulenti quid eo contineri, non autem liquores acceptos intra haerere reconditos. Postquam igitur levi, suspensaue dextera exiguo hunc pertudi vulnuscule, continuo qua data porta, ruebat cum sibilo sonoro, & valido impetu, inclusus prius, atque arctatus aër, flaccidus extemplo residebat penitus tumidus antea ex aëre ventriculus. Nihil ille quidquam supra descriptos flatus continere jam visus est; nisi quod parum liquidi, quod colore erat dilute ex fusco rubre-

rubefcente, in eo jam collapsa fluctuaret. Sanguinei hoc in liquore nihil mistum fuit, biliosi nihil, aut corrupti, foetidive, imo tandem & cibi vix ullae restabant reliquiae.

Tum vero demirantes nos omnes, & stupefactos, videre erat. Reperiebamus insignem nullam morbi in ventriculo notam. Nullus ibidem tumor, color nullus mali majoris index, ne levia quidem inflammationis invenimus vestigia. Unde autem contigerat, ut sanus adeo, omnique crassiore materie vacuus omnino, flatus adeo turgidos haud dimiserit ventriculus, ne a morte quidem, per quam vis musculorum spasmodes resolvitur? Haec autem ferenda forent: quaenam capi potest ratio vacui ventriculi, in quem tanta vis liquorum affusa fuit? quorum tamen nullum vestigium usquam repertum sub pyloro est, nec in fistula intestinorum universa, nec in vesica, neque in ipso tandem abdominis cavo. Ego quidem dicam, attonitum usque adeo me haesisse, ut dubitarem fere, an somniarem vigilans: quum reperi rem eo in loco nihil, in quem affluxisse omnia, erat mihi quam maxime persuasum. Necessario igitur in thorace tandem investiganda credebatur mali vera causa, illum ergo anxius perscrutandum oculis. Ut vero efficerem id ipsum securissime, omnia prius abdo-



minis viscera suis reposita locis ordinavi, ipsa deinde hujus integumenta in situm composui quemadmodum naturalem, tumque cum cura nexus naturales futura imitatus sum, diaphragma ut suo rite rursus loco thoracis formam redderet.

Quibus curatis, postmodum

I. Pectus aperire aggressus prudentissime, lente incidi communia primo integumenta corporis, dirigendo semper secantis cultri aciem per curvam lineam, quae describi intelligitur per loca, quibus extremis costarum ossibus committuntur cartilaginum steri lateribus applicatarum averſi a steri no fines. Hac in parte orſus a ſecunda ſuperiore coſta, rexi cultrum per deſcriptam ſemitam uſque ad eam regionem, qua inferiorum coſtarum cartilagines limbo ſepti medii incipiunt accreſcere. Nec valui tutiorem excogitare rationem, ut ſecurus non perturbati ordinis, interiora conſpectui exponerem. Ne mireris vero, quod hac in ſeſtione tardiuſcule proceſſerim : deprehendi & ita eandem hic conditionem inflati adipis, ex molli ſua indole in renitentem duritiem mutati. Diductis ſua ſponte hiabat & hic labiis vulnus. Singula haec obſervare erat animus. Poſtquam ergo adacti cuſpis cultri ad pleuram jam fere penetraverat, haec ipſa, ut  
antea



antea in abdomine membrana peritonaeum, in bullatae speciem vesicae per intercostalia, & mesochondria, intervalla extrorsum ab interna parte thoracis eminebat; haud aliter, quam si flatu ingenti in pectoris cavum acto per interstitia costarum, & segmentorum cartilagineorum, membrana haec haud parum urgeretur. Sed, o res mira! Vix acuti apex cultelli per exiguum pleurae inflatum foramen penetraverat tam parum, ut subjectarum partium ne ullam vel attingeret, quin subito, magna cum explosione, & perdurante diu sonitu, aër per minimum hoc vulnusculum prosiliret ita, ut violentia in exeundo, & temporis, quo protrahebatur hic exitus, longitudo omnino demonstrarent magnam aëris copiam hac via exivisse. Quum tam clare hoc animadverterem propriis fere diffusus oculis, auribusque, commonui iterum omnes rei penitus insolitae. Quis enim notavit unquam, exsiliisse aërem de thorace hominis, cui nullum externe appareret inflicto vulnus? Qui respiratione usus fuerat? Cui nulli pars, sola excepta pleura, in pectore erat pertusa? Sane, si in physiologicis nullum, id compertum est effatum verissimum esse, nihil aëris haerere naturaliter inter concavam pleurae, & convexam pulmonum superficiem. Eo quidem ruere posse, si per

soluta morbo quocunque bronchia admittitur, aut per patentia in cavum ejus usque vulnera thoracis se penetravit, chirurgica docent. At, pulmone integro, neque vel per tardum, neque vel per acutum, morbum laeso, tum etiam absque ulla vi externa, totum pectoris cavum aëre elastico, compresso, atque longe fortius se expandente, quam externus in communi athmosphæra valebat, inflatum fuisse, prodigiosum sane! quis autem mortalium cogitasset unquam de tertia via, qua potuisset ille huc pervenisse?

2. Haec quidem dum volvo mecum, totque mirabilibus velut perculsus obstupesco, fidelibus tamen oculis utens, manibusque, solvo quam cautissime sternum elevatum prius sursum & leniter quidem: ut transparentes per membranas dilucens ab altero latere irradians candelae lux doceret, quam hic nihil praeternatnræ; utque simul evaderem certus, me, hoc agendo, nihil, solas praeter membranas, dirimere. Praecidi deinde & arcus cartilaginosos a diaphragmate; quo, sublato jam penitus sterno, certo posset videri habitus, situsque, partium in pectore locatarum. Et tum, certe in mediaestino, pericardio, & pleura, notabatur omnino nihil, quod incusari posset, aut suspectum haberi, quasi ad haec mala attulisset quidquam,  
aut

aut & ex eo fuisset aliquid passum. Diaphragma quoque, prout hoc rerum situ conspicuum se offerebat, ab omni conspicienda la-be immune videbatur. At aliud pulmonibus accidisse observatum fuit, quod in nullo unquam corpore vidisse me scio. Erant enim illi, utroque in latere thoracis, tam parvi, adeoque collapsi, ut quasi valida vi undiquaque applicata extrinsecus compressi in angustissima spatia invenirentur. Colorque his inerat cinericeo multo pallidior, atque vergens omnino in album. Porro sanissimi observabantur, quousque ita spectati superne, oculis objiciebantur. Qua equidem contemplatione non mediocriter commotum me sensi: quum praemissum modo observatum persuaserat, in pulmonibus notabilis quid iri spectatum, unde pateret via, qua aëris tanta vis in cava se pectoris insinuare potuerat. Cor ipsum in pericardio jam aperto quam vegetissimum jacebat, nec in hoc ejus hospitio ulla labes.

3. Sed simul prima incisio aperturam in pectus fecerat, exhalavit de eo insignis nidor, qui adeo vivide peculiarem carnis anatis odorem referebat, ut temperare mihi nequiverim, quin in haec erumperem verba; demiror, unde singularis hicce halitus, adeo infuetus thoraci, si in ventriculo versaremur, puta-



putarem utique anatum carnes eo contineri. Occurrebat statim haec proferenti verba Dominus *Francken*, qui ultimo in prandio *Baroni Nobilissimo* assederat, dixitque haud temere id sagacibus suboluisse naribus: hunc enim fuisse praecipue cibum, quem ultimo in prandio, haud ita multis ante initia mali horis, assumserat. Neque enim haecenus rem illam narraverat mihi quisquam; sed compertam hoc demum tempore, hacque primum occasione, superius inserui historiae, quae recitavit ea, quae ante inchoamenta morbi accidissent corpori. Fuitque omnium prima haecce causa, quae incepit persuadere nobis, detegendam ocysus longe aliam malorum causam, quam de qua fuerat cogitatum haecenus.

4. Eam vero liquidius cernebamus, quando statim, volens pulmonum lobos in dextro latere sitos elevare parum; ut scirem, an hi penitus illaesi forent? detexi rem, quae per se ipsa mira fuit, & ad quam omnes obstupere simul, quotquot aderant. Quid enim? natabant hi in subjacente humore, qui totam resupinati thoracis cavitatem a parte dextera integram replebat inferius; atque levato hinc pulmone fluctuans cernebatur. Id postquam cuncti viderunt quam certissime, attollo quam mollissime pulmonem in hoc-

ce latere, eumque tam suspense, molliter, & sollicite tracto interea, ut abesset omne laedendi periculum; tum cotyla primo porcellana exhausti de pectore, hoc ad latus, liquorem inibi haerentem, reliquias deinde bibula, sed purissima, spongia absorbui, inque unum vas infundens, atque pressa spongia demittens, omnem liquorem collegi, illamque ita partem pectoris perfecte mundavi, laedens omnino nihil, neque suo movens loco.

5. Antequam ulterius pergere auderem circa haec, converti ad sinistram thoracis partem, ubi ilico invenimus omnia quam maxime similia, ut fueramus demirati in altero latere. Liquor enim & hic aderat extra vasa omni specie, colore, odore, atque ipsa quoque copia, idem perfecte illi, qui in dextro erat deprehensus cavo. Et illum igitur pari cum cura inde collegi, priorique affudi, pectus & ab hac parte summa cum sollicitudine purgans ab omni humore effuso. Erat vero hic idem omnino omni facie illi, qui inciso ventriculo ibidem apparuerat: utrobique color cerevisiae gedanensis dilutioris cardui affusa aqua, ex rubescente fuscus; odor nidorem carnis anatum distinctissime exprimens; supernatabat hic quoque oleum de amygdalis pressum abundantia circiter illa, qua epotum  
fue-

fuerat ultimo; spissitudo, ingestis prorsus respondens, vix superabat multum aquae fluiditatem, nisi quod parum admodum consistentis magis materiae hinc inde intersparsum spectaretur. Post severius tamen examen ne guttula sanguinis in toto cernebatur liquore; neque apparens ullum indicium puris inerat, neque vero ullum aderat aliud signum corrupti humoris. Abundantia curatione expensa ad stateram exhausti illius ex cavo thorace utrimque aequabat uncias integras centum & quatuor, secundum Amstelædamensium ponderum rationem facta supputatione. Certi hujus rei, magis jam magisque coepimus intelligere modum mali; indaganda supererat via, qua notus humor huc delatus fuerat.

6. Itaque, expurgato nitide pectore, levissima suspensae manus actione elevatos lateris sinistri pulmones, retinendos quam blandissime adstanti dedi famulo chirurgo, patulum sic hac a parte perlustravi thoracem intentissima in omnem ejus plagam oculorum acie; sanissima undique reperiiebantur omnia eousque, donec oberrantes oculi ad eum pervenirent locum, qui distabat duabus a diaphragmate uncis, in illa parte pleurae, quae incumbit ibidem sinistro oesophagi lateri; ubi cernebam evidenter plagam;



gam, quae laxitate, colore nigrescente, tum & tumoris quasi flatulenti specie, satis se superque a caeteris distinguebat. Substiti, movi nihil, compellavi praesentes, spectarent locum, ubi credebam tanti mali integram originem haerere. Dum singuli, suo quisque ordine, acie oculorum observassent locum ita affectum, qui orbiculati figura tres forte pollices in diametri mensura aequabat, detexi manifesto in ejus medio fissuram hiantem, cujus longitudo sesqui pollicaris, parallela basi corporum vertebralium dorsi, latitudo, qua patebat, trium forte linearum mensurae aequalis, spectabatur; hanc statim, moniti, omnes, ordine rursus quisque suo, quam distinctissime, lente, diu viderunt. Dein pressi apice digiti quam lenissimè elatam flatu veluti hujus tumoris superficiem. En ocyus ex raro, & flatulento, loco defluebat per fissuram in cavum sinistrum pectoris humor quam simillimus illi, quem utrimque exhaustum antea fueramus mirati; quique, sub elata in hoc loco pleura, in raram suppositae membranae cellulosae texturam vi sua se penetraverat, itaque effecerat tumorem bullatum atque nigrum colorem diffusum per definitam modo plagam. Quam attonitos reddiderit hoc spectaculum facillime Tu, mi Lector, capis. Eo itaque sollicita

licita magis cura perquirendam ultra conditionem censuimus, maximeque cavendum prae caeteris, ne scrutinio efficeremus ullum, praeterquam quod ipsa mali indoles ex se haberet, malum. Prudens ideo, quam mollissime, apicem indicis digiti aperturae hiantis in pleura vulneris ori applicui, lenissime intromisi in admittens facile vulnus, offendi omnia mollia, inflata, supra vertebrarum corpora, usque in alterum dextrum cavum thoracis patentia; sic enim elata inflatu, & repletione, membrana haec texturae rarae valde, tenuis, & cellulosa, secesserat ab aliis partibus. Tum vero adstabam intentus, quid hoc esset rei? neque enim vestigium oesophagi in toto tangebam vulnere. Sed hoc illud erat monstri horrendi, quod hic alebatur! quippe, dum reducti leniter digiti apicem per vulnus hoc placidissime sursum volvo, in vacuum ille devolvitur sponte locum; abrupti, sursum retracti, oesophagi partem assequitur, facillime totus pendulum cavum intrat, extrinsecus conspicitur in oesophago, jam eo ingressus, tumore suo manifeste. Vix mihi met credo exploranti, cunctos stupefactus advoco, monstro rem inauditam, nunquam expectatam. Postquam eduxi, nemo adfuit, quin exploraret ipse; tandem rursus immisso indice meo dextro per vulnus paricum



cum circumspeditione, introitum inveni deorsum in ipsum ventriculi cavum.

Sed & ibidem abrupti oesophagi versus diaphragma retracta pars se aliquantum subduxerat, ut superiori accidisse jam descripsi. Quibus ita explorato cognitis, neque per lenissimam laxè admissi digiti perscrutationem ullâ noxiâ ulteriori partibus a morbo laesis illata; ad distantiam trium pollicum sursum a vulnere jam cognito infixi acutissimo scalpello plagam sinistro oesophagi lateri, ita quidem, ut haec in cavum ejus ductum, nec ultra, penetraret, eo quidem animo, ut constaret spectantibus, quò versus, immissus per hoc vulnus, digitus ipsa hac via duceretur deorsum quam lenissime actus; nec mora, exivit sic adacti apex per illam fissuram, quam morbus vi majore molitus erat.

En Tibi, care Lector, horrendi mali tristissimam historiam! hanc moestissimo ipse sane, in ipsam tamen rei veritatem intentissimo, animo ita descripsi, quemadmodum fataliter contigit; ut tuto Tibi credere fas sit, nihil quidquam additum, praeterquam quod ipsi fideles oculi liquido cernebant, omissum nihil, quod ad rem intelligendam apparebat necessarium. Ulterius alia hic scrutari, corpusque lacerare frigentis, religio, reverentia atque pietas, vetabant. Tu  
D sane,



sane, proprio ex ingenio speculationi uberri-  
mam materiem jam nactus, plurima elicies,  
quae ad intellectum naturae humanae faciunt,  
alia, quae calamitatem imbecillae machinae  
nostrae & fragilitatem, indicent novo qui-  
dem, horridique mali, exemplo. Meum  
puto pauca legere, quae suos in usus discere  
hinc Medicae artis Studiosi queant, atque,  
ne verborum inanium ventoso tumore odio-  
sus Tibi sim, in simplicissima corollaria con-  
trahere. Certum itaque ex enarratis puto.

1. Nihil eorum, quae ultimo prandio as-  
sumta fuerant, causam praebuisset malo:  
quam nulla deprehensa fuerit materies, quae  
mole sua potuerit incommoda esse; longe  
aberat, ut ita laedere potuisset. Apparebant  
quippe ingesta omnia jam perfectissime vi na-  
turae resoluta in liquorem fluidum, sive in  
ventriculum introspectaremus, sive expen-  
deremus ea, quae in thorace deprehendeban-  
tur utrimque. Inprimis vero cernere erat  
interiorem totius ventriculi membranam, in  
qua inflammati nihil, nihil erosi, lacerati-  
ve, videbatur; contra verò omnia integra,  
nisi quod inflatu distenta nimium turge-  
rent.

2. Nihil ullius veneni fuisse, quod ero-  
dendo dissolvisset partes, vel irritando spas-  
mos lethales excitavisset: neque enim tale  
quid

quid ingestum fuerat. Sedulo nimirum in primo statim examine, quum anomala praecipuis, heteroclita, & inopinato orta, symptomata nos urgerent, exactissimis minimum distantes quam exquisitissima omnia indagine perquirere, nihil invenimus quidpiam suspecti. Et quidem tanto acrius haec excussimus, atque diligentius, quo Nos ipsi, in tam insueto morbo omnia magis suspecta haberemus. Verum, neque in ventriculi aperti membrana interiore, ut jam distincte memoratum est, apparebat ullum dubium, aut obscurum, signum vel minimae inflammationis, corruptionis, erosionis, aut fiderationis. Imo vero ne ulla quidem materies heteroclita, aut corrupta, quae saltem notam ullam daret talis mali. Quum nullus saniosus adesset ichor, tabefacti humoris nihil, neque usquam conspiceretur insoliti coaguli quidquam, aut ullus alius effectus veneni.

3. Quin etiam jure asseruero, haudquam deberi atrocis morbi ortum ulceri jam pridem genito in ea stomachi parte, quae deprehensa fuit dilacerata, quodque lenta tabe membranas peredisset tam ipsius oesophagi, quam pleuram & cellulosa. Haud dubito, fore plerosque, rerum in primis peritos medicarum, ita qui sentiant. Neque

diffiteri fas est, vel nos ipsos talia potius suspicari voluisse primo, quam credere longe minus possibilia, dum poneremus, valentem suae tenacitatis robore fistulam hanc subito, absque praegressa labe, ruptam fuisse: maxime quidem, quum nulla appareat vicina, aut contigua, pars, quae vi sua agere possit in hunc tubum tanta cum distractione, ut discerperetur ille haecenus integer. Plausibilem praeterea hanc opinionem Medico reddit morborum in cadaveribus inspectis descriptorum historia fidelis. Crebra ibi ulcerum in ventriculo atque & in intestinis quoque deprehensorum, recteque firmata descriptio habetur. Quin & harum partium membranae, ulcerosa tandem teredine tabefactae, penitusque peresae, mortis praesentes causae habitae fuerunt. Tandem & hoc videbatur inducere Nos, ita ut opinaremur, dum recordabamur scilicet, saepenumero queri solitum Nobilissimum Virum de malo quodam, quod ponderis cujusdem ingrati sensum faceret ori ventriculi, quamque praecipuam Ille causam habebat, cur toties vomitu conaretur arte excitato levare se hoc premente onere. Ut omnia haec tribuamus, non ideo dederimus caetera. Intelligis interim pulchre, & tua sponte, quisquis haec revolvis, haudquaquam perfunctorie Nos potuisse



tuisse rem tantam agere, neque negliger. Sed quo lustraremus acutori, magisque clara, acie, & plagam ipsam, & vicina illi loca, eo evidentius omnia dissuadebant huic subscribere sententiae. Quando enim undique conspiciebamus omnia, atque pertractabamus digitis, nullus cernebatur tumor ulcerosus usquam latere; neque vero oculo, manuive, apparebat ulceris ulla species, nulla elatior, simulque fungosa, moles, labia nulla turgida, humida, spongiosa, purulenta, cava nulla sinuosa, nullae flexuosae fistulae, nihil ex partibus usquam deperditum, nihil in tabum purulentum molliter liquefscens. Contra vero, omnia, undique, vividam referebant speciem recenti divulsione disruptarum partium, in quibus suppurati, tabefacti, exesi, gangraena corrupti, peccaret omnino nihil. Neque Te morari patiaris tumorem mollem inflatae, turgentisque, in plaga, membranae cellulosaе, quem prius depinxi, quem adfuisse jam dedi: Quum exploranti sedulo, atque diligenter, constiterit, hunc modo ortum habuisse ab impulsu humore, qui, rupto jam stomacho, ibidem actus, sub pleura adhuc integra sese insinuaverat in dilatabiles facile loculos tenues hujus partis: pressus quippe locus eructabat eundem prorsus, qui in ventriculo, & in

thorace, fluctuaverat, humorem. Forte autem mentem subit cogitatio, nigrum tamen apparuisse partis laesae colorem, certissima quidem gangraenae notâ. Ita & ipse putabam a principio, simul ac intuenti se offerebat primo vulnus. Verum tamen ocyus mutavi sententiam, quoties videbam nihil hic gangraenosi, velexesi, adesse, nec cadaverosi foetoris ullum signum; ipsum denique liquorem fuisse nigrum, qui a Carduo, Cerevisia Dantiscana, potu ipso assumpto, haerebat in loco, & intenderat partes. Sed & nunquam olim, imo vero neque in ultimo quidem prandio, ulla unquam querela audita fuit de ullo incommodo, quod expeditae, atque facili deglutitioni obstitisset. Quod tamen omnino necessarium videbatur, si ex antiquo ibidem lateacente, aucto, atque tandem omnia depascente, abscessu recens hoc, atque fatale subito, ortum duxisset. Et sane ponderis in summo ventriculo sensus adeo frequens, & familiaris, est quam plurimis, ut magni momenti hac in re vix habendus sit. Eo magis quidem, quo nunquam de urgente acerbitate ejus conquestus fuerit, levem modo a compressu molestiam incusaverit.

4. Nihil adeo restat, nisi ut cogitemus, recenti dilacerationi partis adscribendam morbi rationem, & causam. Credibile videtur, quum

quum septem vasa infusi ex Carduo Benedi-  
cto haussisset, indeque evomuisse parum, di-  
stentum satis fuisse ventriculum hoc tempo-  
re, neque deorsum constricto pyloro demi-  
sisse quidquam. Solet enim tanto difficilius  
se exonerare ille, quo magis impletus turget.  
Quia vero infarctu turgidus, semper deor-  
sum, atque antrorsum, agitur, utroque sa-  
ne modo fortissime omnem nixum impendit  
diaphragmati, cui concrevit, atque stoma-  
cho, cui producto connascitur. Protinus  
ergo anxio, atque oppresso, a tanta aquae  
copia summi fuerunt tentati, & adhibiti, at  
frustra diu, vomendi conatus. Sed in hoc  
quidem fortissimo nisu, qui fit convulso vio-  
lente versus inferiora septo, tensus jam a tu-  
mente prius ventriculo, atque a gula intruso  
faucibus digito sursum tractâ simulque irrita-  
ta, stomachus dilaceratus extemplo videtur.  
Hoc enim conaminis articulo clamorem hor-  
rendum sustulit, ruptumque quid interius  
nimis vere exclamavit, statim ante nihil  
omnino hic mali passus. Haudquaquam ve-  
risimile, totum hoc momento temporis tu-  
bulum hunc abruptum fuisse, sed continua-  
ta impleti ventriculi tensione, diaphragma-  
tis motu, irritatione geminata gulae, ipsa-  
rum denique fibrarum contractione, primo  
impetu natum vulnus assiduo magis, magis-



que, lacerando dilatatum, tandemque discerptum penitus. Interea solus, absque Medici consilio, haustu quatuor unciarum olei Olivarum, atque gulac nova digito sollicitatione, intolerabiles inter dolores, aliquid olei assumpti, & liquoris Cardui Benedicti infusi, magna cum vi rejecit, summos inter nifus. Rursum ejus quidpiam sorbens, atque absque ulla dein sequuta ulteriore nausea retinens. Hausta dein iterum Cerevisia Gedanensi calida ad  $\frac{3}{4}$  v, Jure vitulino postea copiose ingesto, caeteris usurpatis, liquoribus, atque retentis sine reddito fere lotio, absque nausea, sine vomitu, videtur ventriculus per os superius egisse liquores, caeteraque sua contenta, lata jam vulneris via in membranam cellulosa, tum ipsam, horresco referens, utrimque pleuram dilacerasse, sicque, quadata porta, fuisse haec omnia in utrumque thoracis cavum, una cum aëre tam hic semper praesente, quam & eo, quam assidua deglutitio huc deduxit atque affudit. Vera haec esse, evincit paucitas lotii, vomitus nullus, inanitas ventriculi solo aëre distenti, copia assumptorum, horum omnium tota quantitas reperta in thorace, cum eo odore, atque colore, ut ingesta fuerant, ante dilacerationem oesophagi, recta in cavum ventriculi. Liquet hinc, in robusto hoc

cor-

corpore quinquagenario majori, sic dilaceratas membranas, totas nervosas, atque acutissimi sensus, dolores peperisse omnium exquisitissimos, nunquam remittentes, semper acerbiores. Intelligitur admissum huc, calefactum, rarefcentem, pressumque aërem in cellulosae membranae laxas, subtilissimasque ambages, usque ad subcutanea loca prius descripta pervenisse, eaque in verum emphysema inflasse; redituque sanguinis arteriis advecti per venas compressas impedito, ubique lividas vibices atque sugillatas exhibuisse maculas per latera utrimque dispersas. Denique certum inde habetur, cuncta haec non valuisse mortem afferre prius, quam aër tanta copia ex ventriculo, & gula, per vulnus in utramque fuerit delatus pulmonum apothecam, ut hi amplius explicari haud potuerint, tum enim respiratio impedita fecit malorum finem.

5. Tandem puto verissime adseverare mihi fas esse, malo huic jam nato, atque certissima per indicia praesenti cognito deinceps, nihil quidquam ab arte praesidii, nihil omnino spei, affulgere. Etenim deglutitio ipsa assiduo necessaria est ad humectandas fauces, illisque suppositas partes; quum tamen omnis ille, qui deglutietur, humor non in ventriculum ire queat, sed per patens in oesophago vulnus intra thoracem deflectat. Sed fac, ni-  
hil

hil talis liquidi huc transmitti, ipse nihilominus aër deorsum latus ingreditur patenti hoc aditu in cavum pectus, cito illud replebit, atque suffocabit certo: si quid vero in alimenta, vel potulenta, aut & pro remediis, laboranti offertur aegro, omne illud pariter liberam in thoracem affectabit viam, ibidemque deponatur aggestum, necesse est. Fateor equidem, capienti horum omnium nihil longior trahetur, tanto tamen miserabilior, spiratio. Si vero exquisitissima fuerit, qua aeger ille ab omni omnino re deglutienda sibi temperat, abstinence, quamdiu igitur hac ipsa afflictum sustinebit spiritum? tristi licet fame se enecet, ignea ut siti aridum corpus depascatur, mortaliū miserrimus. Mille certe intolerabilibus cruciatuum inevitabilium tormentis consumtus in dies durabit quam paucissimos, ut in novas semper, dirasque, crudelitates usque sufficiat, millies interim maturam pro solatio mortem implorans. Hae tamen omnes solae haudquaquam lethalis languoris habendae sunt causae: quum & pertinacissima quoque austerissimi de abstinence perfecta decreti observatio prohibere impar sit, ne abundans perpetuo in vacua ventriculi spatia undequaue depositorum humorum colluvies eo ruat. Quinimo nequidquam tentabit quis, quacunque demum arte utens, impedire aëris ad



ventriculum accessum. Ille quippe semper vel praesens intestinis inest, aut ex materie, quae semper ibidem affatim suppetit, flatulenta generatur, uterque ad inanem facile adigetur ventris specum. Quam expeditum vero omnibus his per direntum oesophagum, vel ructuum specie, iter est? Erit itaque omnis interclusa hic ad salutem via: quoniam ipsa illa, quae non declinabili necessitate ad vitae sustentaculum actiosa requiruntur, cogunt lethum suos corripere gressus.

Non hic mihi objiciat insani auctor quis consilii, pertundenda esse dextera Chirurghi loca intercostalia! Neque jactet, educi sic posse humores, qui in cavitatem thoracis defluerant! Dicet, scio, naturam hac exoneravisse saepenumero infestam saburram, instantisque elusisse mortis minas, quando in hydrope pectoris frequentius, saepe in empyemate, quoties autem effusus in thoracem cruor nocebat creberrime, paracentesis beneficio levata fuerat. Ostentat sane ex inepta, & ridiculosa, assimilatione fatalem inscitiam, quisquis exitiale adeo moliri suadet opus! Ponderet ex vero, protinus videbit, quam sit dispar ratio, quamque periculosa plenum opus aleae, quod intentatum nitet. Admissus scilicet per vulnus lateri inflictum aër confestim in cavum irruet thoracis, atque suspen-

fi

si hoc in latere pulmonis fibras comprimet, ut usui spirandi mox sit ineptissimus; quum vero & in parte altera urgeat eadem necessitas, perforatione ergo & ibi peracta, ingressus per plagae ora aër hoc etiam in latere pulmonem statim comprimet; adeoque, ut vel in elementis est Medicis, uno momento temporis hic aeger suffocabitur. Vetat igitur sapientia Medica, tale quid incipere, dedocetque praecipites dare nobis vitio, quod lethale hoc consilium negleximus. Neque sane verbis ultra opus est. Unum forte, quod mecum facere jure arbitror, si apposuerò in eos, qui carpere, & fingere, audaces, indociles vero saniora amplecti, ni aperta in luce se convictos videant. His ego si dederim, quod nemo largietur, valuisse opè paracentesios tuto evacuari illos de pectore liquores, ne sic tamen, vel remotis his, profuturus erit aegrotanti Medicus, nisi ille pariter suprahumana industria reperisset modum, quo protraheret incolumem homini vitam, absque ulla necessitate, absque ullo usu, novae deglutitionis. Quod vere esset Promethei instar, pro arbitrio ingenii, partes apponere, rursumque corpora hominum de integro refingere!

Quare tandem omni hac disputatione effectum prudens colligo; *morbum descriptum, quum occurrebat, a nobis certas per notas cognosci non potuisse, si autem fuerat perspectus, optima tamen auxilia fuisse aspernaturum. Posthac autem, indicio hujus historiae, detegi quidem posse, ubi recurret, ventiquam ullo professionis salutaris officio sanari.*